

07 MAR 2000

MSC-INDONESIA

INDONESIA BERHASRAT GUNA PELAN MSC SEBAGAI CONTOH

KUALA LUMPUR, 7 Mac (Bernama) -- Indonesia, terdorong oleh kejayaan Koridor Raya Multimedia (MSC) Malaysia, berhasrat untuk menggunakan pelan dasar MSC untuk mengadakan projek yang serupa.

Untuk itu, sebuah konsortium lima syarikat dan pertubuhan teknologi maklumat (IT) Indonesia akan bekerjasama dengan Perbadanan Pembangunan Multimedia (MDC) untuk melaksanakan projek multimedia itu, demikian menurut MDC dalam satu kenyataan yang dikeluarkan di persidangan media di Cyberjaya hari ini.

Konsortium yang terbabit terdiri dari Institut Teknologi Bandung, PT Indosat Tbk, PT Sisindosat, Yayasan Ilmu Pengetahuan & Teknologi Indonesia dan PT Krakatua Information Technology.

Menurut MDC, di peringkat awal, kerjasama itu akan fokus kepada prospek memajukan aplikasi e-dagang, e-kerajaan dan sekolah bestari dalam industri multimedia Indonesia ini.

Kerjasama antara konsortium dengan MDC akan dimeterai menerusi sebuah memorandum persefahaman (MoU) yang akan ditandatangani di Jakarta, Indonesia pada Khamis dan disaksikan oleh Perdana Menteri Datuk Seri Dr Mahathir Mohamad, katanya.

Pada April, delegasi perniagaan IT Malaysia akan ke Indonesia pada bagi merangka butir-butir bidang pembangunan yang berpotensi. Delegasi itu akan diketuai oleh Pengerusi Eksekutif MDC Tan Sri Othman Yeop Abdullah, tambahnya.

Di persidangan media itu, Naib Presiden Kanan MDC Dr Mohamed Arif Nun berkata hasrat Indonesia ini menangkis kritikan yang dilempar terhadap MSC.

Ia menunjukkan bahawa kejayaan MSC memberi ilham kepada orang lain untuk mengkaji model berdaya maju dan konkrit bagi projek-projek serupa mereka sendiri, tambahnya.

Sementara itu, Ketua Kajian IT dan Telekomunikasi di Institut Teknologi Bandung, Dr Ir Munawar Ahmad, berkata selain dari bekerjasama dengan Malaysia, pihaknya juga bekerjasama dengan negara-negara lain di mana konsep dan aplikasi akan dibandingkan dan yang terbaik akan dilaksanakan dalam projek multimedianya.

Antara pihak bekerjasama dengan konsortium itu itu ialah Lembah Silikon di Amerika Syarikat dan Cyberport di Hong Kong. Ia juga bekerjasama dengan Jerman dan Singapura.

Kerjasama MDC dengan Indonesia ialah hubungan keempatnya dengan inisiatif IT asing.

Kerjasama lain ialah dengan Amerika Syarikat dalam projek HUBS (hospital, universiti, perniagaan dan sekolah), Sri Lanka dalam sistem tempatan perjalanan elektronik talian terus, dan Emiriyah Arah Bersatu (UAE) dan Mesir dalam sekolah bestari, teleperubatan, e-dagang dan undang-undang siber.

-- BERNAMA

MFZ JR